

# 蹇叔哭师

僖公三十二年

## 左 传

杞子

秦大夫。三十年，秦伯与郑人盟，使杞子等戍郑。

自郑使告于秦曰、郑人使我掌其北门之管。

管、锁钥也。

若潜

师以来、国可得也。穆公访诸蹇叔。

秦大夫。

蹇叔曰、劳师以袭远、非所闻

也。

轻行而掩之曰袭。破潜师得国之非、下作两层写。

师劳力竭、远主备之、

兵师劳苦、其力必尽。远方之主、易为之备。

无乃不可乎。

一层言郑不可得。

师

之所为、郑必知之。勤而无所、必有悖心。

郑既知之、则秦兵勤劳而无所得、必生悖逆之心而妄为。

且行千里、

其谁不知。

不但郑知、他国无不尽知、伏下晋人御师。○一层言师不可潜。

公辞焉。

不受其言。

召孟明、西乞、白乙、使出师

于东门之外。

孟明、姓百里、名视。西乞名术。白乙名丙。

蹇叔哭之曰、孟子、

呼孟明也。

吾见师之出、而不见

其入也。

十三字、要作哭声读。

公使谓之曰、尔何知。中寿、尔墓之木拱矣。

合手曰拱。言尔何有知识、设当中寿而死、尔之墓木已

拱矣。极诋其衰老失智也。

蹇叔之子与

去声、

师、哭而送之。曰、晋人御师必于殽。

殽地险阻、可以邀击。晋有宿怨、御师必在于此。

殽有二陵焉、

大阜曰陵。

其南陵、

夏后皋

桀之祖。

之墓也、

其北陵、

文王之所辟

同避、

风

雨也。

殽之北陵、两山相嵌、故可以避风雨。  
○点缀情景、惨淡凄其、不堪再诵。

必死是间。

余收尔骨焉。

四十一字、  
作哭声读。

秦师遂东。

为明年晋败秦  
于殽张本。

谈覆军之所、如在目前。后果中之。蹇叔可谓老成先见、一哭再哭、  
出军时诚恶闻此。然蹇叔不得不哭、若穆公之既败而哭、晚矣。